



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Sikkim CMPS Tamang-i  
Kokrajar semdang

Ni anir tongpang nung  
nokdaksü: Ethiopia PM



VOL. XIX NO. 447 (ADOK 447) DIMAPUR RASEMNÜ (WEDNESDAY) YIMPOKSÜI (NOVEMBER) 24, 2021

₹ 5.00

## COVID-19 Nagaland: 8 dak putet & 7 anep

**Kohima, November 23, 2021 (TYO):** Nagaland nung Mongulbarnü nisung 8 dak COVID-19 aliba putet aser 7 taneptsü angu.

"Tanü putetertemji Dimapur nung nisung 5, Kohima nung 2 aser Mokochung nung 1 lir" ta Integrated Disease Surveillance Project atema State Nodal Officer, Dr Nyanthung Kikon-ashi.

"Taoba ghonda 24 tsüingda COVID-19 agi shiranger nisung 7 taneptsü angu. parnokji Dimapur o Kohima nung asemsem (3) aser Kiphire nung 1 lir" ta pai ashi.

Nisung 32,060 nungi 30,186 taneptsü nguogo aser ibaji taneptsü angur 94.12% lir, ta paisa shisem.

Tang nisung 126 anepaludar

saka parnok 98 dakbo shiranga yimya kecha mali, ta Dr Kikon-isa metetdaksü.

"Hombar tashi nung nisung 728,015 nem COVID-19 vaccine indang dose 12,62,395 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,976, healthcare workers 15,999, arishi küm 45 ser tempur 206,396 aser arishi küm 18 nungi 44 tsüingda alir 444,644 lir" ta paisa metetdaksü.

"Vaccine agirtem rongnungi nisung 534,380-i dose anaprong agiogo. Parnokji frontline workers 48,341, healthcare workers 13,484, arishi küm 45 ser tempur 169,851 aser arishi küm 18 nungi 44 tsüingda alir 302,694 lir" ta Dr Thurr-isa ashi.

## Kohima nung traffic police merenshiogo

**Dimapur, November 23, 2021 (TYO):** November 22, 2021 nü Kohima nung truck driver tem dang sen meshiba traffic police jangjaogo aser department-i pa merenshiogo, ta PRO, Kohima Police-i tanü metetdaksü.

Iba indang video ka social media sabang aika nung kanga prokshio.

Iba ama ozüing alema inyaksangshiba osang ya tongti ketdangsürtem nem sangoktsütsü mepishir, ta Kohima Police-isa ashi.

## Tseminyu district meshia kilometer 53 jajaogo

**Dimapur, November 23, 2021 (Agencies):** Nagaland nung Tseminyu district balaka kümteptsü takhangba agüja Mongulbarnü nisung 73-i kilometer 53 jajaogo.

Rengma Selo Zi (RSZ)-i 'Tseminyu District Demand Walkathon' ayongzüik aser tanep 3:00 ako nungi Tseminyu nungi jaja tenzüka Kohima nung solidarity park nung tembang.

"Onoki kilometer 58 jajatsü lemtet kechiyong 1963 küm Nagaland-i state angu aser sülen küm 58 ajunger. 1948 küm Tseminyu ya administrative unit ka akümba sülen küm 73 tashi timtema aruba tamaitü tanü nisung 73-i jajaogo" ta RSZ president Kenneth Kath-i ashi.

Rengma nungeri mapang talangka Tseminyu district balaka akümtsü akhangba sorkari asangsang nung atalokdaksütsü

atema onoki walkathon ayongzüka agi, ta paisa ashi.

Rengma Naga nungeri Tseminyu district balaka akümtsü takhangba agüja RSZ-i ozüingi melaba ama lungkak aitba sentongtem agitsü aser iba nung walkathon ya shilem ka lir ta Kenneth Kath-isa metetdaksü.

"Nagaland nung administrative headquarters tejentiba rongnung Tseminyu ya ka lir. Iba administrative headquarters tenteter küm 73 süiaka sub-division ka ama dang lir. Ajisüaka, 1947 nung bench courts akümbatembo district headquarters kümogo" ta paisa shisem.

Taküm October ita Kohima District Planning and Development Board (DPDB)-ia Tseminyu Sub-Division nungi Tseminyu district akümtsü atema state sorkar dangi benogo.

## Manipur, Meghalaya, Nagaland nung vaccine agütsütsü ayongzüker

**New Delhi, November 23, 2021 (Agencies):** Hombarnü Union Health Minister Mansukh Mandaviya-i Manipur, Meghalaya, Nagaland aser Puducherry dang vaccine agütsüba maparen tuluba inyaksü ayongzüko.

"COVID-19 wara anema rara nung vaccine ya kanga tongtipang lir anungji state tem aser union territory-i NGOs, tamangba yimsü teloktem, tamangba lennirtem, lokti lennirtem aser tangar teyari agia mapa tuluba inyaksüla" ta Union

Health Minister-i ashi.

Hombarnü Manipur, Meghalaya, Nagaland aser Puducherry nungi health secretary tem aser health department nungi tongti ketdangsürtem den online ajanga senden ka amendang pai iba osang metetdaksü.

"Tang tashi nung Manipur, Meghalaya, Nagaland aser Puducherry nung vaccine kanga ajema agütsüba osang lir" ta Union health ministry-i sangdong ka nung metetdaksüogo.

## Nübertemi aginüba ama NDPP tentet: Chingwang Konyak



November 23, 2021 nü NDPP Office Kohima lapokba sülen Nagaland Chief Minister, NDPP President Chingwang Konyak, MLA tem aser party lennirtem agiba noksa angur.

**Kohima, November 23, 2021 (TYO):** Nübertem indang taginübatem inyaksü aser sorkar ketdangsübaren melenshir terenlok mapa inyakba Political Party ka tentetsü aginüba Nationalist Democratic Progressive Party (NDPP) tentet, ta NDPP president Chingwang Konyak-i tanü ashi.

NDPP indang 4 buba general convention nung Chingwang Konyak-i iba olen jembu. "NDPP Party-i state tajungba akümtsü atema asalentong tajung aika yangluogo aser lenisüba tashi itshio" ta pai ashi.

"Chief Minister Neiphu Rio lenisüba kübok Nagaland nung sorkar tashi itta lir. Naga yimten tebilemtsü mebenetba ajanga Nagaland tejakleni aotsüba maparen ajak nung tetsükdaksü ajurur" ta paisa metetdaksü.

"2018 Election Manifesto nung nangzüka ama NDPP aser Chief Minister Rio kübok PDA sorkari yimjung maparen nung yaritepa arur aser tekaratiba nung telemtetba ka agitsü atema yariteper" ta Chingwang-isa ashi.

Tawa ano Opposition maliba

United Democratic Alliance (UDA) sorkar akümba ya olemteper ajak den ola ka ser yariteptsü atema lir, ta paisa shisem.

"2018 NDPP manifesto nung Nagaland nung sorkar ketdangsübaren tajung nüngdakba shia lir. Sorkar ketdangsübaren ajungtsü aser tashishitsü melii inyaksü asoshi ano süoki ia merangteptsü nüngdaker" ta NDPP president-isa metetdaksü.

Nagaland nungi Lok Sabha MP, Tokheho Yephthomi-i o jembidang "Rio ya chief minister tajungtiba aser pai Naga nung atema inyaker" ta ashi.

"Pa lenisüba kübok mapa aika inyaktetogo aser ano aika inyaksüba lir. NDPP tanishirtemia Chief Minister aser MLA nem dang meyütsü kechisa inyaksü lir'ar repringshimtsüla. Asenoki tera merangra, asenok sasa sorkar akümtsü lenmang lir" ta Tokheho-isa ashi.

"Nübertemi Naga loktiliba nung temelenshi tajung ka aginüba ama NDPP tentet. Tesüiba küm 4 tsüingda NDPP züngsem lakh 1.6 kümogo" ta

NDPP secretary general, Abu Metha-i metetdaksü.

"Noksen aser Shamatore-Chessore menden ana atema by-election nung NDPP candidate temi takok anguba ajanga Chief Minister Rio aser President Konyak na lenisüba ajungba aser nübertemi NDPP party sapuba kuli sayur" ta paisa ashi.

Iba senden nung Nagaland Legislative Assembly Speaker Sharingain Longkumer, Agriculture Minister G Kaito Aye aser Horticulture and Border Affairs Advisor Mhathung Yanthan nungertemia tayongzüka o tem jembu.

Maneni, Women Organization president Vikali A Zhimomi aser Youth Organization president Kelhouniezo Yhome nati osang agütsü.

Senden nung mendenji NDPP working president Alemtemshi Jamir Iasiu, State Chaplain Yamyap Konyak-i temoatsü meshia sarasadem, working president Nyamnye Konyak-i tesentepertem pelaa agizüka aser senior vice president Charlie Sekhose-i anküp tepela o jembu.

## NPF-i dang Naga yimten tebilemtsü atema inyaker: TR Zeliang

**Dimapur, November 23, 2021 (TYO):** Naga yimten tebilemtsü atema inyakba political party ka dang alibaji NPF lir. Political party aikati election mapang dang Naga yimten tebilemtsü atema jembir saka NPF indang tongti alizüngji Naga yimten tebilemtsü lir, ta Naga People's Front Legislature Wing, TR Zeliang-i ashi.

Mongulbarnü Kohima nung NPF Central Women Wing Co-ordination senden amendang TR Zeliang-i iba olen jembu.

"NPF party-i Naga yimten tebilemtsü atema jembiba dang masü saka mapa inyaker. NPF-i sorkar yimsü asüba mapang political party (11) ajak den civil society tem dena bangzüing ka renem. Ibaji 'election matongdang telemtetba' atema liasü aser 2018 State General election atema party tickets magütsütsü mesüra nomination masütsü bangzüingtep. Ajisüaka, BJP-ibo kasa anogo nung iba bangzüing nung madentsü lemtet" ta TR Zeliang-i ashi.

"Loktiliba nung tetsürtem indang shilem tongtipang lir. NPF party-i ibaji agizüka 2017 nung local urban bodies nung tetsür nem 33% lemzüksütsü osang

metetdaksü saka public-i anema noktakba ajanga mapa küma meinyaktet" ta paisa metetdaksü.

Sangküm Manipur state election nung NPF-i menden teimba nung takok angutsü aser Naga maitsü den party kümzüka ayutsü, ta TR Zeliang-isa shisem.

"NPF party ya azü aser nüktzü ayimba mapang ka nung tentet aser Naga nung asoshi alizüng yur tentet. Tanga political party tem election atema aser tashi den sen angutsü atema tenteter saka regional NPF yabo Naga nung asoshi tentetba lir" ta NPF President, Dr. Shürhözeli Liezietsu-ia ashi.

"NPF ya Naga nung shia meyong lir aser tanü tanishir aika political party balala nung lir saka parnok künübo NPF-i meyipa arutsü kechiyong iba party ya Naga nung meyong lir" ta paisa ashi.

Iba senden nung Manipur State unit women Wing Sano Vamuzo, advisor Central Women Wing aser Central Youth Wing nungi tanishirtemi o jembu.

Senden nung mendenji General Secretary, Central Women Wing Wongshikokla liasü, Secretary Central Women Wing Shaan Khiam-i temoatsü

meshia sarasadem, General Secretary Central Women Murry-i tesentepertem pelaa agizüka aser General Secretary Central Women Wing Zhokholü Nyekha-i anküp tepela o jembu.

Iba senden nung Manipur State Unit tanshirtem aser Nagaland State nung divisional unit 14 nungi lennirtem aden.

Senden nung NPF Women Wing-i President, Dr. Shürhözeli Liezietsu aser NPF Legislature Party leader, T. R. Zeliang na lenisüba pusema nungittsü bangzüingtep.

NPF Women Wing-isa President, Miss Yanhola Yimchunger lenisüba pusemtsü aser party wing tashitaitba akümtsü atema bendanga agütsüshir inyaksü bangjemtep.

Manipur State Assembly Election 2022 nung party candidate ajak nungita yaritsü ta NPF Women Wing-isa telemtetba agi.

NPF Women Wing-isa ketdangpur 23 aliba nungi teimba akümtsü, 2023 Nagaland State Assembly General Election atema Unit level ajak akangshitsü aser election matongdang Nagaland Division office ajak semdangtsü telemtetbatem agi.



# Sikkim CM PS Tamang-i Kokrajhar semdang



Sikkim chief minister Prem Singh Tamang nungertemi Bodoland Territorial Region (BTR) semdangba noksa nung angur.

**Kokrajhar, November 23, 2021 (Agencies):** Sikkim chief minister Prem Singh Tamang den cabinet minister ana- Bedu Singh Pant aser Arun Upriti nati Assam kübok Bodoland Territorial Region (BTR) semdang.

Sikkim CM PS Tamang-i Kokrajhar nung Central Institute of Technology (CIT) guest house atong aser idangji BTC chief executive member (CEM) Pramod Boro aser deputy CEM Gabinda Chandra

Basumatary nati pa pelaa agizük.

Sikkim chief minister Tamang ya Hombarnü Guwahati-i aru aser Siliguri-i aotsüba liasü saka tsüngsang majungba ajanga pai gari lenmang ajanga aodang Kokrajhar nung anenzük.

Pai tang agi tanabenbuba BTR semdang ta Sikkim chief minister-i ashi.

Par sorkari Assam aser BTC sorkar den tesentaktep tajung ayur, ta paisa ashi.

BTC chief Pramod Boro-i pa pela agizükba atema PS Tamang-i pelaba metetdaksü aser Sikkim-i arutsü jaok.

Sikkim chief minister Tamang den ajurutepba atema pelar, ta BTR chief Pramod Boro-ia ashi.

"Iba mapang onoki onük aika lemsatepogo" ta paisa ashi.

BTC sorkari yakta Sikkim nung organic farming angazüki aotsü atema ketdangsurtem yoktsü ta Pramod Boro-isa ashi.

# Aizawl nung Mathematics indang mungdang tembangogo

**Aizawl, November 23, 2021 (Agencies):** Hombarnü Mizoram nung 'International Conference-cum-Workshop on Mathematics Education' tembangogo.

November 15 nungi tenzüka hopta ka mungdang ya Mizoram University (MZU) aser University of Guadalajara, Mexico ajanga ayongzük aser Mizoram Human Resources Development Board o Mathematics Society of Mizoram ajanga yaritep.

Iba mungdang tembangba sentong nung MZU pro- Vice-Chancellor Prof. J.K. Patnaik, University of Guadalajara secretary Dr. Oscar Blanco Alonso aser state school education minister James

Lalrinchhana nungertem aden. "Mizoram University-i kaketshirtem dak nungi mathematics tsübuba tangatetba agientsü aser jangradaktsü atema inyaka arur" ta J.K. Patnaik-i ashi.

"Iba mungdang nung mathematics tesayurtemi aika angazüker alitsü" ta minister James Lalrinchhana-ia ashi.

"Mathematics tesayurtem aser mongin nisungtem longjemtsüla aser technology amshia kaketshirtem dak nungi mathematics tsübuba ya agiendaktsütsü merangtsüla" ta Dr Oscar Blanco Alonso-ia ashi.

Hopta ka amongba mungdang nung research scholars 612 tashi aden aser

research papers aika nungi final presentation atema papers 20 shim.

Johannes Kepler University, Linz nungi Doctoral scholar Shereen El Bedewy nem Best Paper sempet agütsü. Lai 'Taj Mahal as an Architectural, Mathematical, Cultural and Historic Reason for a STEAM practice' indang zülü.

Ajaki meteta aliba mathematician Dr. G.C. Dominguez (USA), Prof. T.K. Dutta (India), Prof. K.Fenyvesi (Finland), Prof. B. Kaur (Singapore), Prof. Z.Lavicza (Austria) aser Mizoram pioneer mathematician Dr. LN Tluanga nungertemi mathematics education indang onük balala lemsatepa liasü.

# ANSU-i ghonda 12 atema Itanagar ajunga mokdang

**Itanagar, November 23, 2021 (Agencies):** All Nyishi Students Union (ANSU)-i tanep 5:00 ako nungi nikongdang 5 ako tashi Itanagar mokdanga liasü.

Tanü ANSU-i Itanagar ajunga mokdang aser nija gari ka danga mesenzükdaksüi noktang.

ANSU-i education wadang nung maparen tajungba inyakang ta education department nem takhangba agüja iba mokdang ayonga agi.

Tanep nungi dokan, petrol pump, office ajak shibang aser lungkak aiter nisung meyrjang aikati yimti anük.

District administration-ibo iba mokdang ya ozüngi memelar ta ashi aser iba jagi security kanga akangakanga ayu.

Ajisiüka, lungkak aitertemi police gari ka indang driver yi jemer aliba agi raksatsü.

All Nyishi Students' Union (ANSU)-i Commissioner Education IAS Niharika Rai Arunachal Pradesh nungi anientsü aser ANSU züngsemtem anema ken o tem benoka aliba agientsü takhangba agütsür.

"Niharika Rai ya mapa makokba ketdangsur ka lir aser lai kaketshirtem nem temeten magütsür. Anungji lai Arunachal Pradesh nung ketdangsur inyaksü temsüa mali. State nung education maparen tajungba akümtsü atema onük 14 indang takhangba agütsüba agizüka inyaksü melena lai kaketshirtem hao ta mali yutsü" ta ANSU-i metetdaksü.

Niharika Rai-i department pezü nung Commissioner and Secretary inyaker aser iba jagi mapa aika meinyaki anendaka lir.

Taküm September ita ANSU central executive züngsemtemi onük 14 takhangba agütsütsü atema Chief Minister Pema Khandu dangi ao saka idangji state civil secretariat telungi aidang police den mangatetep ka adok. CM den senden amendang ibaji ken o ji angatetep saka anogo ishika stüir külen parnok anema FIR benoka osang angashi, ta ANSU ketdangpurtemi ashi.

November 23 nü mokdang aliba sülen state sorkari mapa kecha meinyakra mapa tuluba inyaksü ta parnokisa ashi.

# Gauhati HC-i Saibur Rahman indang bail magizük

**Guwahati, November 23, 2021 (Agencies):** Tawa Chief Minister's Vigilance Cell-i apuba Assam Civil Service ketdangsur Saibur Rahman nem Gauhati High Court-i bail temelaba magütsü.

Saibur Rahman ket nung Rs 6.38 crore tema rongsen lir aser iba nungi 95% ji pa sen arulen den kanga agi meputep lir ta Chief Minister's Vigilance Cell-i metetdaksü.

Rahman-i ozüng alema rongsen aika benden ta tai tonglokja lir. Iba nung ajemdaker

Chief Minister indang office-i bushisüngdang asütsü tetuyuba agüja liasü.

"23-6-2002 nungi 30-4-2021 tashi nung onoki pa keti aruba sen aser pa indang rongsen medemdanga liasü" ta Vigilance Cell-i ashi.

"Pa sen aruba den rongsen kanga agi meputepba bushitet. Paia sen paika aruba indang kuli tejangja magütsüet" ta parnokisa ashi.

Mongulbarnü Vigilance team-isa Rahman anema 92-paged charge sheet ka agütsüogo.

## GOVERNMENT OF NAGALAND DIRECTORATE OF HEALTH & FAMILY WELFARE NAGALAND :: KOHIMA

No. DHFW-5/TRG-PG/2019/ / Dated, Kohima the th Nov, 2021.

### NOTIFICATION

This is for general information to all the intending Medical Graduates who are seeking admission to MD/MS/Diploma Courses at RIMS, Imphal under "Sponsored" and "Open" category that PG seats will be allotted to eligible candidates from the State-wise merit list of NEET-PG 2021 through physical counselling to be held at RIMS, Imphal.

#### A. SPONSORED CATEGORY :

Sl. No	Subject	No. of Seat
1.	MD (Biochemistry)	1 (One)
2.	MD (Dermatology & VL)	1 (One)
3.	MD (Gen.Medicine)	1 (One)
4.	MS (Ophthalmology)	1 (One)
5.	MD (Paediatrics)	1 (One)
6.	MD (Physiology)	1 (One)
7.	MS (Respiratory Medicine)	1 (One)

#### B. OPEN CATEGORY: (Graduates from RIMS, Imphal only)

Sl. No	Subject	No. of Seat
1.	MD (Gen. Medicine)	1 (One)
2.	MD (Gen.Surgery)	1 (One)

Application form can be obtained from the Academic Section, RIMS, Imphal on payment of Rs 100/ (Rupees one hundred) only or can be downloaded from the RIMS website www.rims.edu.in

The last date of submission of application forms will be intimated and published on the Institute's web portal.

SD/- ( DR. NEIKHRIELIE KHIMIAO )  
Principal Director  
Dte. of Health & Family Welfare  
Nagaland, Kohima.

Issued by DIPR

Form No. 3

[See Regulation-15 (1)(a)] / 16(3)

### DEBTS RECOVERY TRIBUNAL GUWAHATI

Suwarna Bhawan, House No. 12, New Town Path,  
Near Hanuman Mandir, G.S. Road, Ulubari, Guwahati- 781007 (Assam)

Case No.: OA / 142 / 2021

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No. 1386

BANK OF BARODA

- VS -

MR. HYUNGWALO JESHING RENGMA

To,

(1) MR. HYUNGWALO JESHING RENGMA

D/W/S/O- Mr. H. H. Jeshing, R/o H. No. E/A- 1/01 Agri Colony, Opp. Stella Higher Secondary School, Kohima, NAGALAND- 797001.

#### SUMMONS

WHEREAS, OA/142/2021 was listed before Hon'ble Presiding Officer / Registrar on 12.11.2021.

WHEREAS this Hon'ble Tribunal is pleased to issue summons/notice on the said Application under section 19(4) of the Act, (OA) filed against you for recovery of debts of Rs. 97,44,685.72/- (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under :-

(i) to show cause within thirty days of the service of summons as to why relief prayed for should not be granted;

(ii) to disclose particulars of properties or assets other than properties and assets specified by the applicant under serial number 3A of the original application;

(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;

(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/or other assets and properties specified or disclosed under serial number 3A of the original application without the prior approval of the Tribunal;

(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on 28.12.2021 at 10:30 A.M. failing which the application shall be heard and decided in your absence.

Given under my hand and the seal of this Tribunal on this date: 15.11.2021.

Signature of the Officer Authorised to issue summons.

## Pope Francis-i India semdangtsü aliba atema renemshir



November 22, 2021 nü Press Club of India, New Delhi nung tamangba yimsü balala nungi lenirtem seminar agidang tangokba noksa nung angur.

**New Delhi, November 23 (Agencies):** November 22, 2021 nü New Delhi nung yimsü balala nungi tongti lenirtem seminar ka agiba mapang tawa Pope Francis aser Ato kilonser, Narendra Modi na senden amenba pelaa agizükba den külemi yimsü balala amangertem adianu ama temeimtep nung aliba jenjang ajungkettsütsü atema bangjem.

Taoba ita Rome nung G20 summit senden nung adentsü aoba mapang Modi-i Vatican nung Pope Francis ajurua liasü.

Pope Francis-i India semdangtsü aliba atema renemshiba tenzükba Hombarnü Press Club of India, New Delhi nung "Encounter" omen nung ajemdaker seminar ka agiogo; iba sentong nungji India nung tamangba yimsü balala nungi lenirtem, putirtem, nun tem aser osangbenertem aden.

Iba sentong nung okila jembidang Delhi tongti putir, Anil Joseph Couto-i, "Asen Ato kilonser-i Pope Francis ajuruba

atema yimsü balala nungi lenirtemi yimsü balala amanger ajak tesünep nung alitsü aser asen linük renloksü atema bangjemer," ta metetdaksü.

Paisa, India nung sobaliba, kin aser tamangba yimsü aika lir, aser asenoki maneni iba maitsü wazüka ayutsüla, ta ayongzük.

All India Imam Organization nung tongti lenir, Umer Ahmed Ilyasi-i, Pope Francis-i India Ato kilonser agizükba aser India semdangtsü melungba atema pelar; nüburtemi asen linük nung adianu ama temeimtep alitsüla, ta ashi.

"Chichiba yimsüji sensakertem, amitsürtem aser lajartem yariba lir," ta paisa ashi.

Indian Parliament of Religions national president, Goswami Sushil Ji Maharaj-i, Modi-i Pope India-i jaokbaji mera tuluka agiba lir, aser pai tekaraba nung India semdangtsü imlar, ta ashi.

India Ato kilonseri Pope jaokba ajanga osang tajung ka

sangoktsür, talisa tanga yimsü amangertem akhümtsübutsi ayongzük, ta ashi.

Hindu nunger lenir, Swami Krishnanand Paramhans-i, "Asen to kilonseri Pope semdangba ajanga pai yimsü ajak akhümtsübuba kuli sayur," ta ashi.

International Mahavir Jain Mission nung President, Acharya Vivek Muni-i, India nung sobaliba balala aika liaka yimsü balala amangertem ajak telongjem nung alir, ta ashi.

Kasa sentong nung Gurdwara Bangla Sahib nung tongti putir, Giani Ranjit Singh aser Ramakrishna Mission, Delhi nung tongti, Swami Shantatmananda natia jembia liasü.

Iba seminar tembanga yimsü balala nungi lenirtem taruba Khristmas nung Yimjung Chuba tanela ajanga asen linük kongshitsü atema sarasadema liasü.

## Afghanistan nung Khristantem nem mapa maongka magütsür

**Yimpoksi/November 23, 2021:** Yaküm Afghanistan nung tzunglu junga maruba agi alu nung chiyungtsü junga mezüsente liasü aser taküm US sepaitemi Afghanistan totsür aoba sülen Taliban yimsüsüba kübok rongsenkettsüing jenjang kanga mejungi kümogo, ta International Christian Concern (ICC)-i metetdaksü.

Taküm August ita nungi tenzükba Taliban yimsüsüba kübok linük nung aliba bank tem nung sen mali, shishilembaba jenjang mejungi kümogo aser nisung aikati yawara tensa ajangshidar. Iba ama tensa ka nung Khristantem nembo mapa maongka magütsür.

Tang Afghan nunger million 23 shi aya-tzüra tia nung lir aser Khristantem densema minorities nem mapa maongka magütsür.

Afghanistan nung Muslim nunger dak alaka Khristantem, Hindu nunger, Baha'is aser Sheiks nungerbo loktiliba nung sendoker aser bendanga züngshir.

Afghanistan nung Sunni Islam ya official yimsü lir, aser Muslim nunger kari danga tanga yimsü agizükra parnokji linük ashioksürtem ama züngshia tasüba temerenshi mesüra

tanga temerenshi tulu agütsür. U.S Department of State-i Taliban telok ya 'Entity of Particular Concern' list nung züngokogo, kechiyong parnokki religious freedom anema inyaker. Taliban telokisa osangbenertem aser tetsürtem nem temeden aika magütsür.

ICC-i ashiba agi, US sepaitemi Afghanistan toktsür maodang iba linük nung Khristan nütsüing 8,000-12,000 shi liasü, ajisüaka tangbo iba linük nung Khristan kwi aliar mejangja, kechiyong Afghan Khristantempei yimsü mimshir aser miima dang tekülem agir.

Taküm September ita nung taoba mapang Ambassador-at-large, Sam Brownback-i, tang Afghanistan nung minority tem talitsü majung kümogo aser nisung jenti tepsettsüsa tensa ka nung lir, anungji pei yimsü atema timtemertem agizüksü atema iba ya US atema maongka tajung, ta metetdakja liasü.

Sam-isa, America ya temeden agütsüba aser maongka agütsüba linük ka lir, anungji US ya maneni timtemertem nem teimla agütsüba linük ka südaksütsüla, ta metetdakja liasü.

## ANO GO ABEN TSÜNGREM DEN

### Temsüa jajaang

..., koba ajaba agi nenok ajak, iba ajaba temsüa jajatsü, Ni, Kibuba nung tepuokbai nenok dang mepishir. Efesa 4:1-3

Pauli Efesa 1-3 nung Khristan tesayuba aser Khrista nung tamanger ka jenjang indang jembia. Tang iba tapu nung tamanger mapa aser yimya lemsateptsü indang jembir. Pai pasasa Khrista nung tepuoker ka ta jembia aser tesem kar Tsüngrem aser Khrista asoshi talenba kilir taaka amshir. Pai tamang katetta aser tashi angaa Yisu sülen anidaktsüba tasak ta metetdaksünü saka parnok tajaba temsüa jajatsü Pai ayongzük. Tamanger tekümtet dangi ajaba nung Tsüngremi taochi talubusa sayu (Yn. 15:16), parnok tetemsü ta masü, saka tamangertem temsüa jajaba agi Pai aochiba sayutsüla.

Pauli asenoki anogo shia jajatsüba meraji tanü asenok dang sayur. Yisu jajaba ama jajaba, Yisui bilemba ama bilemba aser Yisui jembiba ama jembiba ajanga asenoki temsüa jajaba sayur. Kibubai asenok dak kongshia tasüngdangba ka asüngdang aser ibaji asenok ajaki langzüksüla. "Kechiba nenoki Kü dang Kibuba, Kibuba ta ajar, aser Ni ashiba meinyaker?" (Lk. 6:46). Asenoki kechi inyaksüla Pai shia lir.

Nai Kibuba ne Tsüngrem meimang, aser ne kiyonger meimang. Pai asenok tali tayongzükba agütsür: "Kü dang Kibuba, Kibuba ta ajar shiai kotak yimli-i aitsü masü, saka shibai kotak nung aliba Kü Bui mulungba ama inyakdir pa aitsü" (Matt. 7:21). Asenoki tejembidang mejembia, tejajaa jajatsüla; temsüa jajatsüla.

Tsüngrem, tanü Nai kü o tem aser mapatem anüksü ni Ne dang mepishir.

## Wisconsin nung jeli Khristmas sentong ka nung nisung 5 tsükset



November 21, 2021 nü Waukesha, Wisconsin (US) nung jeli Khristmas sentong ka nung gari kati shilem agirtem dak tsükoktsüba sülen yirua alirtem yariba noksa nung angur. Iba lendong nung nisung pongu tsükset aser nisung 40 dak tema yiru.

**November 23, 2021:** Amongnü (November 21) Waukesha, Wisconsin nung jeli Khristmas sentong ka nung gari kati shilem agirtem dak tsükoktsüba lendong nung nisung pongu tsükset aser nisung 40 dak tema yiruogo.

Red Ford gari temerem ka kanga kera aruba sülen Khristmas jeli sentong nung shilem agirtem dak tsükoktsüba sülen jena ao.

Amongnü aonung Waukesha Police Department-i, iba lendong nung tang tashi nung nisung pongu süogo saka ano asütsüa akok, kechiyong karbo kanga mejungi yirua lir, ta metetdaksü.

Wisconsin nung Attorney General, Josh Kaul-i twitter ajanga, "Waukesha nung tatalokba ya taoksatsüka lir. Aibelenertem pua temerenshi agütsütsü," ta metetdaksü.

Josh Kaul-isa, iba tatalokba bushisüngdangba maparen nung Department of Justice-i akokba tashi yariteptsü, ta metetdaksü.

Osang angazükba agi, ozüing benokba ketdangsertem gari anisangji arrshi küm 39, Darrell Brooks Jr. lir ta jangjaogo. Pa apuba sülen pa dang asüngdangyadar.

Brooks (MathBoi Fly ta ajar) ya rap kentener ka lir, aser tawa ang (Hokolbarnü) pa jail nungi bail nung chioka liasü. Brooks ji

tanga tesem ka nung raratepba sülen gari nung ajenba mapang lenmang nung lokti ajurua tsükoktsü asütsüa akok ta bilemer, ta ketdangser kati metetdaksü.

Waukesha nung nütsüing 72,000 shi lir, aser parnokki küm shia 'Thanksgiving' matongdang Khristmas jeli sentong agir. Taküm parnokki "comfort and joy" omen nung ajemdaker iba sentong agia liasü.

Milwaukee nung Roman Catholic Arogoi sangdong ka ajanga, iba lendong nung putir ka, Arogo züngsemtem aser Catholic school nung azüngertema kar yiru, ta metetdaksü.



# TIR YIMYIM

## YIMOBILEM (EDITORIAL)

DIMAPUR RASEMNÜ, YIMPOKSÜI (NOVEMBER) 24, 2021

### Naga nunger obendangdak

**T**ang Nagaland nung Dobashi-temi Naga nunger akhidang nungi benshia aruba sobaliba aser temzüng ozüng nung ajemdaker obendangtsü atema "Customary Courts" alitsüla ta akangba ken o ya state government-i ano khen jungjunga repringdanga bilemdangra, iba nung jagi tang aser tarutsü Naga nunger asoshi tagitsü mapa tasen aika tenzüka otetsü. Customary court tetezü putu tasenba nung latetba temzüng ozüngtem nung ajemdaker masü saka akhidang nungi tsüraburtemi obendangtsübaren nung ajemdaker ken o akadak mesüra obendang agütsüdak obendangdak arsalang ta angatetsüa akok. Akhi Naga nunger tsüraburtem azüng zülu memetetaka, parnok dak Tsüngremi agütsüba shisatsü aser tangatetba tulu liasü, anungji iba teindang shisatsü aser tangatetbaji amshia mangatetep alidak ken o angadanger obendang shitak agütsütet. Atangji, obendang agütsübaren nunga Naga nunger akhi tsüraburtemibo, parnoki bendangtsü mekokra, Tsüngrem nem bendangdaksü, anungji Naga nunger sobaliba nung tematiba okadak aser obendang agütsüdak (Supreme court)-jibo Tsüngrem dang liasü. Iba tashiji asen tsüraburtemi anung aser ali madak teyanglur Tsüngrem dak amanga aru. Aji oda, kodang kija mesüra lokti ana tsüngda ali aser tzu artsü raktepa mangatetep adokdir, iba ken o ji angadanger tatar yimsüsürtemi obendang magütsütetra, ali rakteper anaprongla nem Tsüngrem dang azüngashia aliji chitepdaksü aser tzu rakteper süra tzuji jemtepdaksü aser anogo ishika tsüngda, ali achir aser tzu ajemertem rongnungji shir dak tamajungba agi tongdir parji aitsü. Atangji, Naga limai British aser India nunger ozüng amshi metenzük tashibo, Naga nunger mesüra Naga nunger rongnunga pei kin kübok kin ajak asoshi tsüka okadak aser obendang angudak külem obendangdak mali asü, kechiyong Naga nunger asoshi pei yimtsüngjiang pei lima aser pei yimten yimli liasü, anungji ken o benoka okadak aser obendang angudaka, pei yimtsüng nung yimtenjiang temzüng ozüng latetdak aser obendang angudak sabang liasü. Ajisüaka, British nunger aruagi Naga nungertem madak yimsüsütsü tenzüka mapang nungang, parnok yimten kübok aliba yimtsüng, tükong aser kin shia madak o meyiptsü atema dang masü saka yimsüsütsü aser obendangtsü asoshi Naga kin shia nungi sobaliba ken o metetter tain rogotem nungi nisung kar shimtet aser parnok dangji Dobashi ta aja. Temetetertemi ashiba agi, Dobashi tetezü Do basha (oshi ana) metetba nisungtem liasü. Tetezü, British nungertemi jembiba o angateta pei tetsü oshi nung shitetba purtem liasü südi, anungji Dobashi-temji tanü ama kaketreju nung azüngba degree meliaka, parnokji pei sobaliba nung dang masü saka tangar awashi meteter aser shisatsü nung tain aser tajangjemertem liasü ta angateter. Aji oda, British yimteni Dobashi-tem nem nübortem rongnung mangatetep adokba ken o angadanger bendangtsü tashi agütsü. Akhidang, British nunger mapang item Dobashitem jagi Tsüngrem nungi anguba shisatsü ajanga aser pei ajangshiba aser metetba sobaliba temzüng ozüng nung ajemdaker ken o tasak süaka melamelaa obendang shitak agütsüba otsü tajung aika lir. Mapang aser tesem aika nung item Dobashitemji yimsüsür aser obendangertem dang masü saka yimjung yanglurtem liasü. Iba sobalibaji meindoki tanü tashi Nagaland nung yimtsüng nungi tenzüker district jenjang tashi nung Dobashi-tem nübo aser shisatsü amshia yimsüsüba aser obendangba maparen nung state government teyari agiba angur. Iba jagiang, parnok nem government-ia ita sen agütsür. Asenoki mapa küma metenzükteter dang ashi, Nagaland nung temzüng ozüng yanglutsü aser obendangtsü atema Nagaland state akümdangyongi India temzüngia melaa lir. Iba jagi Village Council Act amshir aser yimtak putu mendeni bendangtsüba ken o ji magizüktetra, Dobashi court-i abener. Aji oda, aiben yimtak tatartemi mesüra Dobashi court nung latetbajiang India temzüng ozüng kübok akümba High court aser Supreme Court-ia mulung lemteta agizüker. Atangji, asenok sobaliba obendangdak tatar menden aser Dobashi court ama nung ken o angadanga obendangtsü atema ozüng kakat ka maka, anungji tsürabur mapang nungi angazüka aser benshia aruba tebang o agi dang bendanger. Ajisüaka, tanü putu yabo, joko, tebang o agidang inyakba putu masü asünungji, atangji, Dobashi court-ji district aser state level nung alitsü nungdak saka sobaliba temzüng ozüngji tezüluba nung alitsüla aser senshimenchiba yimyatema tanü putu den apet latettsü nungdaker. Ibaji dang masü Dobashi ta asüba nungja, shim yim aser British yimteni agidaktsüba süoshi dena melen nung dang, shitakba British aser India temzüng ozüng agi alenba nungi nüchiso angur Naga kin akümtsü.

# OLEMSABANG

## ABAM MEYIPA REPRANGSHIBA (RETROSPECTION)

~ Talitemjen Imchen

Jubilee ka amongdangji meyipa reprangshitsü nungdaker. Meyipa reprangshiba ajanga tarutsü nükla tasen jangjashir aser alima putu (civilization) den lirometema lokti kaji ainer.

Kija meyipa reprangshitsü atema mapangji peria kar. Lokti ka meyipa reprangshitsü atema Jubileemong ya kanga tongtipang. Meyipa reprangshiba nung madoksai lira inoksemtsüla aser talila lira süsümetemtsüla nungdaker. Mangateti lira angateta angajemtsü ajak asoshi kanga tongtipang.

Sibsagar nungi Ao lima-i Christian yimsü arudangji, Israel nunger Egypt lima nungi Kannan lima atongba mesüka lir. Tanübo Mopungchuket-Süngratsü lushi nung Christian yimsü kimong IMPUR tenüng nungmejem jateta mesemteter lir. Mezüng ben Christian yimsü ji Molungkimong-i 1872 küm arua kimong mesemetet. Ano 1876 küm Molungyimsen yim tasen küma yangji tana ben Christian yimsü kimong mesemetet. 1894 küm nungibo, American Baptist Arogo senpong nungi lushi alia 1894 küm Christian yimsü kimong tasem ben Impur mesemetet aser ibaji masetshiba kimong ka kümer ABAM tanü tashi liyonga arutar.

Aor züngyazüngko tajung ka lir. Tsürabur den aliba mapang chirnurtem-i inyakba ajak tsürabur tenüng agir aser kodang techir kibong tasen küma tsürabur nungi razüka otir, iba nü nungi Aor sobaliba nung techir jia kibong aser yimden nüpotsük nung züngoker. ABAM-i Sesquicentennial tenüng nung Jubilee Memorial Monument long asem azüngtsü nungbo iba jagi Dr. Edward Clark tsüngnep Aor asoshi tali jangjashitsü imlar.

1. Mezüngbuba Christian yimsü kimong Molungkimong 1872-1876
2. Tanabuba Christian yimsü kimong Molungyimsen 1876-1894
3. Tasembuba Christian yimsü kimong Impur 1894-till date

Iba onük den sendaka tarutsü lanu asensor meratadaksütsü mechi Longkhüm aser Mangmetong den Nokrang atishia otsü tatsüka lemsateper. Longkhüm-i Nokrang amakdang, Longnangba Tsüngrem koma külem, yimti nung anungnuzatem anempong koma lidaksü, Nokrang amaktsü iba kümji alu nung tsüksüngonsüng koma liasü, item ajakji Longkhüm süngkümshi indang arkotong, nokinketerem, tainertem aser arasentsür/sangmongpi asameyang (strategy) nung yanglu aser akok. Yamaji Ao lima nung nokinketer aser walunir jenti washia alidak yim tulu jenti süngkümshi tsütsü masü, Dr. Edward Clark Christian yimsü bener Molungkimong süngkümshi-i aitba Tsüngremer sentong tulu ji, ali meimchir-i kecha agia mezüpangettsü.

Longkhüm-i Nokrang amakdang, Mangmetong ya ano arem dang liasü. Mangmetong nung alirtem-i Longkhüm doktsür aidok nung, Mangmetong asoshi Nokrang amakba naroküm nisung tenüng kar ajaba dak alaka, Nokrang otsü jembitsü semang maka. Saka Nokrang otsü sendakba nung tatalokba kar mejangjai Longkhüm-i asüngdangra longzük long ka ama Mangmetong-i teti atar.

Mangmetong yim kümer külena, Mangmetong süngkümshi indang arkotong, nokinketerem, tainertem aser arasentsür/sangmongpi asameyang (strategy) nung yim aika den lepteptüngtepa akokba otsü jembir mejembimar.

Naga lima revival tenzüka otsü nung, Reverend Riküm revival kodang agiar pai dang metet, saka pai June ita 1952 küm Longkhüm lima revival tenzüka, yim palalai revival milak aoba otsü ji lir. Iba jagi June ita 1952 küm revival tenzüka otsü jembir.

ABAM ya American Baptist chirtem rongnung ka lir aser Christian yimsü ji 1955 küm Aor nem Rev. Kijong tanishir küpok semang ajak doktsür American Missionary ji teti atema oadok. Christian yimsü semang ji Aor indang aser Naga nunger indang lir. Tanü ABAM küpok Sanen Luden züngsemtem koika lir, nenok züngsemtem ji, Tsüngrem tsüngdang asüngdanga shimtetba züngsemtem lir aser tia jagi iba maongka ya nenok nem bener aruja lir. Jubilee tenüng nung Lim Arogo ajak nung medangmetong, korangkoso koika lir, madoksai lira inoksemtsütsü aser talila lira sümetemtsütsü yimsüsürtem ji nenok alaka tanga mali. Amanger alima-i nenok nem khuret aser tashi nungloksüba ama nenoki inyaktü imlar.

Yamaji ABAM-i 2022 küm Sesquicentennial (150 Jubilee) amongdangji, ABAM küpok Lim Arogo ajak dangi, "Jubilee Naklotepba Küm" (Year Of Jubilee Celebration) sangtongtsü yongyatar.

Yi Majemtsü aser Yi Mayoktsü Tsüngrem Den Tezüngzüktepba Agiba nung Aoeer Ajaki Ano Khen Asentenshidi: Iba ya Asen Temang Shi-Azü Ajonga agi Kibuba Meimba lir

~ Tiatoshi Longkümer

(Yashi adok nungi...)

Anungji, alima shisatsü o aika bendena ya ajemba aser ayoktsü atema metena jembitsü merangkasa, taküm aliba Tsüngrem den tezüngzüktepba anema inyaktü makoktsü. Shirnoki iba temeshi tenangzüktepba anema inyaker parnokbo tasüba agi dang O bendangtsü. Kechiyong asenoki Kibuba dang yamaji azüngashiago.

Anungji shirnoki taküm junga aser arishi talang linür parnoki atakatempa ya nungi pilatsü aser ozüng anema ya ayokba nungi meshi-meshia toktsütsüla. Khristar arogo takhangba nung Dry state declared asüba ya asen khuret Nagaland police nem ya ayokertem meita ajitsü nungloka toktsür asenok sadema kazütepba sendong ka masü. Iba ya state ozüng liaka-meliaka, tamanger shiai yi majemtsü aser mayoktsü

ta taküm aliba Tsüngrem den tezüngzüktepa agiba lir. Aji oda, Nagaland nung aser asen Ao lima nung yi ayoker aser ajemer teimba ang akümer ta ajitetra, ibaji asen tamangertemi ayokba aser ajemba agi züiner ashi, tangari bener arua ayokba agi masü. Naga arogotemi yamai tezüngzüktepba agir, ano metet-sümonga dang khristantemi yamai yi ajemba ya Tsüngrem anema inyakba mapa lir aser shirnoki inyaker, yi pure jemaka, aser temeyoktep jemaka Tsüngremer atakatempa ngulanglang. Alima temeten o aika jembiaaka, temesepba chiyongtsü shiri amshir aser ayoker parnokjibo Tsüngremi tasüba agi dang o bendangtsü. Saka shiri yi mesepba jakla mebenshir parnok tepela taküm tajung alitsü ta dang Tsüngrem o nung nangzükba lir.

Tazüngkunem 28: (aser Levi 26) nung tashi angaba temoatsütem, aser tashi mangaba temerenshi ta shia angutsü. Tekong 1 & 2 nung, "Ni tanü nenok nem agütsüba, pai melaba ajak benshitsü Kibuba ne Tsüngrem o nenoki nentaka angadi süra, Kibubai alima kin ajak madak nenok yutsütsü, aser Kibuba ne Tsüngrem ola nenoki angadi süra, item temoatsü ajak nenok madaki arutsü, aser nenok sülen anitaktü."

Ano tekong 15 nung, "Saka tanü ni nenok nem agütsüba Kibubai melaba aser pa telatet ozüng ajak benshitsü asoshi Kibuba ne Tsüngrem ola mangali süra, item atakatem ajak ne dangi arutsü." Pa ozüng angaba temoatsü aser pa ozüng mangaba atakatem.

Otem:

Asenok temang meshiteta, temesepba chiyongtsü nungi pilaa, pei mang junga achayanga ayubaji Tsüngrem tsüngdang tagizüktettsü tekülemji lir, kechiaser Tsüngrembo Tanela aser shiri Pa külemdir atangji nung aser Ochi nung külemtsü tim. Rom 12: 1 "Anungji adianutem, nenoki pei mang taküm tenla ka, temeshi aser Tsüngremi agizüktettsüsa tenlang ta ni Tsüngrem taochi agi nenok ajungshir. Ibaji nenok tanela tekülemba lir."

Asen temang ya Khrista temang ajanga alangzükba takümtem lir. Iba temang asoshi Pa kangkidong nung azü ayim aser asü. Khrista temang raksaba ajanga tanü asenok anepa lir (Isaia 53:5). Anungji koba temang aser taküm, Tsüngrem chir Yisu Khrista taküm agütsüba ajanga alangzük, iba temang ya anepalua Pa meima alitsü pai akhanger.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir**

**OLONG PAITEP # 6006**

1			2			3			4
			5		6		7		
8									
			9						
	10								
								11	12
			13				14		
15						16			

<b>TIPILEN</b>		<b>LANGTSÜNGLEN</b>	
1. Anenzükdak ki	- (5)	1. Reprangdaksü	- (4)
3. Asür mangyimba	- (5)	2. ___ ur	- (3)
5. Temulung nung shisadang	- (5)	4. Kiojen yangludak	- (6)
8. T ___ lu	- (3)	6. _____ ait	- (7)
10. Takdang temalen	- (9)	7. Nagaland nung ayong ka	- (5)
11. Tesa ___ a	- (3)	9. Küm kasa purtem	- (5)
13. Ajungbena temulungjang tongtonglatsü atu	- (5)	10. Tetsung tajemtdak	- (6)
15. Tejen lai nung tesayur	- (5)	12. ___ adenshi	- (4)
16. Tsüngsak-mopung	- (5)	14. Tsünusenbongtsü adokdak	- (3)

**OLONG PAITEP # 6005 TELANGZÜBA**

<b>TIPILEN :</b>		<b>LANGTSÜNGLEN :</b>	
1. Kasa, 6. Rangben, 7. Mait,		1. Khu, 2. Süjak, 3. Onük, 4. Oba,	
9. Poktet, 11. Ati, 13. Atasa, 16. Rür,		5. Anü, 6. Ratet, 7. Mozü, 8. Ita,	
17. Rajang, 20. Lanu, 24. Nungjem,		10. Tar, 12. Tinu, 14. Salem, 15. Aja,	
25. Süra.		18. Anünü, 19. Taju, 21. Ano, 22. Onü,	
		23. Kua.	



**CLINIC KA NUNG :**

**Gentleman** : Doctorbai reprangtsü ano patient kwi anünga ali?

**Receptionist** : Ano patient tenet anünga lir. Tasügnepjia arua asüngdangli oadokli ta, pezünep tashi arua kasaji asüngdangli oadokli ta asüba agi Receptionist la jagi Doctorba dang otsü ajakji ashinung Doctorbai asüngbo arura nai pa sülen anidaka lahdangang ta ashi. (Tasügnep tu)

**Doctor** : Kwa, koma asü yashinep tu?

**Receptionist** : Sir, pa tu na, nür ki bushia indang indanga aoba ati!

Lilir : WhatsApp

**TANÜBO NAI LANGZÜANG**

Q. Koba küm tashi nung Yamuna ayong merüksü atema Delhi Sorkari 'six-point action plan' ka sangdong?  
 [A] 2022 [B] 2025 [C] 2030 [D] 2035

(Taruba adok nung onoki langzütü)

YASHI ADOK TELANGZÜBA : SIDBI

**AO OSHI ANGAZÜKDAK:**

TANÜ ANGAZÜKTSÜBA OJANG



Tir Yimyim

**Leptok**

(v) keyi nem nisung melena azü ka lepboka toktsüba ( dog sacrifice to tiger in lie of human)

\* Putiri Moaba melen azü ka anir oa leptokba agiang pa taküm kümzük.

**Leptok**

(v) nok agi leper endok ( cut off by dao)

\* Kübui ki anasa aliba süngdong kongsang tulu ajak leptok.

**NAI-A YA METETTER MA**

**INTERNATIONAL CRICKET (ODI) NUNG 'PLAYER OF THE MATCH AWARD' TIMBA ANGUR ASAYAR KAR:**

- SR Tendulkar (INDIA)	62
- ST Jayasuriya (Asia/SL)	48
- V Kohli (INDIA)	36
- JH Kallis (Afr/ICC/SA)	32
- RT Ponting (AUS/ICC)	32
- Shahid Afridi (Asia/ICC/PAK)	32
- IVA Richards (WI)	31
- SC Ganguly (Asia/INDIA)	31
- KC Sangakkara (Asia/ICC/SL)	31
- BC Lara (ICC/WI)	30
- PA de Silva (SL)	30
- Saeed Anwar (PAK)	28
- AC Gilchrist (AUS/ICC)	28
- AB de Villiers (Afr/SA)	27
- Yuvraj Singh (Asia/INDIA)	27
- NJ Astle (NZ)	25
- DL Haynes (WI)	25
- TM Dilshan (SL)	25
- A Ranatunga (SL)	24
- Inzamam-ul-Haq (Asia/PAK)	24



Tendulkar



Jayasuriya

**SUDOKU # 6047**

**TELANGZUBA # 6046**

2		1	6	4			8	9	5	1	7	2	6	3	8	4	
			7	2		6	5	4	2	7	6	3	4	8	5	9	1
4	5	6			3	2			3	4	8	9	5	1	6	2	7
	2	4				1	6	9	1	9	2	6	8	4	7	5	3
	9	5	3	6	4	7	8		7	6	5	2	1	3	8	4	9
	6		1			3		5	4	8	3	5	7	9	2	1	6
				1			2		8	1	7	4	6	5	9	3	2
	8	7			9			3	5	2	9	1	3	7	4	6	8
				3	6	8			6	3	4	8	9	2	1	7	5

**OJANG LUTEP # 5603**

HEKN	: [ ] [ ] [ ] [ ]
MAATE	: [ ] [ ] [ ] [ ] [ ]
TEMTIM	: [ ] [ ] [ ] [ ] [ ] [ ]
MAARE	: [ ] [ ] [ ] [ ] [ ]
MEAKNINYER	: [ ] [ ] [ ] [ ] [ ] [ ] [ ] [ ] [ ] [ ]
DANASÜG	: [ ] [ ] [ ] [ ] [ ] [ ] [ ]
ETTI	: [ ] [ ] [ ] [ ]
TEMAA	: [ ] [ ] [ ] [ ] [ ]
MANLENG	: [ ] [ ] [ ] [ ] [ ] [ ] [ ] [ ]
ANGESIBR	: [ ] [ ] [ ] [ ] [ ] [ ] [ ] [ ] [ ] [ ] [ ]

**OJANG LUTEP TELANGZÜBA # 5592**

RONGSEN JENTI LIKA ITEMJI KETDANG ASÜTSÜ SHISATSÜ MELIRA AMAJOK AKÜMER

**TAN HOPTA ATEMA - KOMA SÜLA ?**

Q. Asen lima nung 'Clean Election' indang ya kenyongi mejembi aser meinyak nunga koma süla ?



November 23, 2021 nü Rashtrapati Bhavan, New Delhi nung Defence Investiture Ceremony-3 sentong nung linük Tir, Ram Nath Kovind, Ato kilonser, Narendra Modi aser Defence Minister Rajnath Singh nunger densema ketdangsertem tangokba noksa nung angur.

### Ochimashi anema party tem longjemtsüla: Mulayam Singh Yadav

**Lucknow, Yimpoksüi/ November 23 (Agencies):** Samajwadi Party (SP) tentetsang, Mulayam Singh Yadav-i yimtenren party tem dang ochimashi, mapa manguba tebilemtsü aser osettsüset/chiyungtsü jenjang kanga atuba anema party tem longjemtsüla, kechiyong ajak longjemra linük nung terenlok alitsü, ta metetdaksü.

Sangküm küm tetenzüklen Uttar Pradesh, Goa aser Punjab state tem densema state pongu nung assembly elections agitsü lia opposition party tem longjemtsü atema pai iba olen ya jembia asütsü akok, ta bilemer.

Mongolbarnü Uttar Pradesh yimtiba, Lucknow nung 'Rajniti ke us Paar' ta ser kakat ka

sayaba sentong nung jembidang pai, linük nung ochimashi, mapa manguba tebilemtsü aser jenjang tali atuba tebilemtsü onüktem lir, ta ashi.

'Rajniti ke us Paar' kakat nung party general secretary Professor Ram Gopal Yadav aser socialist lenirtemi inyakba mapatem indang zülua lir.

"Yangi linük ajak (party balala nungi lenirtem) mena lir, aser Professor Ram Gopal-i iba sentong ajanga ajak longjemdaksüba atema pa dang pelar," ta ashi.

Iba sentong nung SP lenirtem, Communist Party of India national secretary Atul Kumar Anjan, Congress lenir aser taoba mapang MP Pramod Tiwari, Aam Aadmi Party nungi

Uttar Pradesh in-charge aser Rajya Sabha züngsem Sanjay Singh aser RJD MP Manoj Jha nunger densema party balala nungi lenirtem aika liasü. Iba sentong nung BJP nungibo ka danga maden.

Mulayam-i, "Linük tebilemtsü onüktem atema ajak longjema lir. Asenok dak iba tanela lira linük nung terenlok alitsü, aser ibaji shingiaia menokdangtetsü," ta ashi.

Kasa sentong nung jembidang SP Tir, Akhilesh Yadav-i, "Iba kakat ajanga socialist tem dang masü saka tarutsü nunga nisung aika ajungshitsü," ta ashi.

Iba kakat ya Hindi sangro zülur, Kumar Vishwas-i sayaja liasü.

### Tourism atema 'Bharat Gaurav' train service tenzüktsü: Ashwini

**New Delhi, Yimpoksüi/ November 23 (Agencies):** Mongolbarnü Railways Minister, Ashwini Vaishnav-i, linük nung tourism sector ajungkettsütsü nükjiding nung sorkari 'Bharat Gaurav' train 180 tenzüktsü sentong lir, ta metetdaksü.

Paisa, iba atemaji Railways-i coaches 3033 jangjaogo aser train service tasen ketdangtsü atema applications meshi tenzükogo, ta metetdaksü.

"Stakeholders-i train service yanglushia ketdangtsü aser Railways-i train anepaluba, park asüba aser tanga facilities agütsütsü," ta Vaishnav-i

metetdaksü.

"Iba ya teti agütsüba service masütsü. 'Bharat Gaurav' trains tongti nükjidingji tourism ajungkettsütsü atema lir," ta paisa metetdaksü.

Tawa Ramayana Special Trains dak sendakba nung mangatettep adokba atema telangzüba agütsüdang pai, iba tatalokba nungi onoki tangazükba kaogo, ta ashi.

Vaishnav-i, "Iba tatalokba nungi onoki tangazükba kaogo. Sobaliba dak sendakba nung lenla aika lir. Design asüba nungi tenzükker chiyungtsü aser süoshi densema tanga lenla balala nung

kanga junga shisadanger ang telemtetba agitsüla. Iba tangazükba nungji ajemdaker tejakleni aotsüla," ta ashi.

Ramayana Special Trains nung inyaker staff tem nem 'saffron' sentsü süoshi semdaksüba kari ashishiba nungi mangatettep adokba sülen Railways-i staff tem süoshi sentsü melentsüogo. India nung 'saffron' sentsü ya Hindu yimsü dak sendakba sentsü lir.

"Service staff tem süoshi melenshitsuogo. Timtem adokba atema onoki sarar," ta Railways-i sangdong ka ajanga metetdakja liasü.



November 23, 2021 nü Lucknow nung aliba party office nung BSP Tir, Mayawati leniba nung taruba Uttar Pradesh assembly election atema senden amenba noksa nung angur.

### PM-i Noida International Airport yanglutsü atema lung azüngtsütsü

**New Delhi, November 23 (Agencies):** Kobi melii India nung international airport pongu tashi aliba mezüngbuba state ji Uttar Pradesh akümtsü; Brihostibarnü Ato kilonser, Narendra Modi-i Jewar nung Noida International Airport (NIA) yanglutsü atema lung azüngtsütsü.

Ato kilonseri aviation sector tajungba akümtsü atema nükjiding yur inyaker, iba dak sendakba nung iba airport-a yanglutsü, ta Mongolbarnü Prime Minister's Office (PMO)-i metetdaksü.

international airport tanabuba asütsü, aser iba airport yangluba ajanga Indira Gandhi International Airport nung tayimsü sadema anena yutetsü.

Iba airport ya kanga tongtibang tesem ka nung yanglutsü aser ibaji ajanga Delhi, Noida, Ghaziabad, Aligarh, Agra aser Faridabad nung alirtem anisüngzüktsü, ta sangdong nung shia lir.

Iba airport nung Ground Transportation Centre alitsü aser iba kübok transit, housing metro, high-speed rail stations, taxi, bus services aser gari parking alitsü. Tetezü airport ji gari lenmang, train aser metro lenmangtem den sendakteptsü.

Tawa Uttar Pradesh nung Kushinagar airport semzükja liasü aser tang state kübok Ayodhya nunga international airport ka teyangludak lir.

Uttar Pradesh kübok Jewar nung ali hectare 1,300 nung iba airport yanglutsü aser küm shia iba airport nungi passenger crore 1.2 shi senzüktsü. Airport tasenbaji 2024 küm tashi nungbosa renemtsü sentong lir.

Airport atema ali alizükogo aser takoksa angur kibongtem nem senotsü teyari agütsüogo, ta PMO sangdong ka ajanga metetdaksü.

Delhi-NCR nung iba ya

Noida aser Delhi na nungi airport tashi metro ajanga sendakteptsü aser Yamuna Expressway, Western Peripheral Expressway, Eastern Peripheral Expressway aser Delhi-Mumbai Expressway ama highways aika iba airport den sendakteptsü.

Iba airport ya Delhi-Varanasi High-Speed Rail den-a sendakteptsü aser ibaji ajanga Delhi nungi airport atongtsü atema minute 21 dang agitsü.



November 23, 2021 nü Bhopal nung aliba Congress party headquarters nung Madhya Pradesh Congress State Tir, Kamal Nath-i Mahila Congress lenirtem ajuruba noksa nung angur.

### India nunger timbakati aluyimertemi MSP akhangba pusemer

**New Delhi, November 23 (Agencies):** India nung aluyimertemi parnok nem minimum support price (MSP) agütsütsü atema Parliament nung ozüing ka benoka agizüktsüla, ta sorkar dang akhangba mapang nung iba onük nung linük sensotem tangatetba metetsü atema linük tesem balala nung IANS-CVoter-i survey ka agi.

aonsotsü, antzü aser an atema MSP akhanger, anungji item chiyungtsü atema-a MSP agütsütsüla asü?, ta survey nung shilem agirtem dang asüngdanga liasü.

Shilem agir 70 dak temai item chiyungtsü atema MSP agütsütsüla, ta telangzüba agütsü aser NDA sorkar pusemer shilem 63-ia ibaji pusema telangzüba agütsü.

Tang India nung Central sorkari aluyimertem nem alu nungi züsentetba chiyungtsü tapu 23 nung minimum support price agütsür.

Iba survey nung shilem agir shilem 61 dak temai, Parliament nung ozüing ka agizüka aluyimertem nem MSP agütsütsüla, ta langzü aser shilem 21-i dang ibaji anema telangzüba agütsü. Opposition voters timbai MSP pusema vote agütsü aser NDA pusemertema shilem 54-i MSP pusema vote agütsü.

Ano tanga aluyimertemi mamatzü, süngjanglijang,

Taoba hopta Ato kilonser, Narendra Mod-i aluyimba ozüing tasen asemprong agentsü sorkari telemtetba agiogo, ta sangdonga liasü, ajisüaka aluyimertemi MSP densema parnoki akhangba onük ajak magizük tashi longkak aittsü, ta sangdongogo.

Aluyimba ozüing tasen asem agentsü atema Bodhbarnü Union Cabinet-i telemtetba agitsü akok aser November 29 nü asükwa mongpu Parliament tenzükba sülen item bill ji agentsü atema Parliament nunga benoktsü.

## Ni anir tongpang nung nokdaksü: Ethiopia PM



**Addis Ababa, Yimpoksüi/Nov. 23 (Agencies):** Ethiopia nunger Nobel Peace Prize sempet angusang ato kilonseri Mongulbarnü nungi tenzuka linük mitkartem tongpang nung anir nokdaksü ashi, aser ibai küm tepiyong raraba linük yimtiba Addis Ababa anasai aruba mapang mera tasen ka alitsü.

Ethiopia aser allied forces temi linük north tsütsü Tigray region nung aliba sepaitem den raraba mapang nisung meyrirjang aika tepseter alitsü, ta asadangteta lir. Abiy Ahmed ato kilonser makumdang Tigray region nung aliba sepaitem yagu linük sorkar amokbanger liasü.

"Asüing nungi tenzuka,

defence forces tem anitsü atema yakbang nung ni inyaksü," ta Abiy-i sangdong ka nung ashiba Hombarnü menur Twitter nung post süja liasü.

"Ethiopia chirtem shirisa teti otsü nung tenüing tetshidaksüner, ner linük asoshi tanü nokdakang. Tongpang nung ajurutepti."

Arishi küm 45 tain ato kilonser aser taoba mapang sepai mapa inyaka alisangi Mongulbarnü pa koloni aotsüar tejangja mashi.

Tigray People's Liberation Front (TPLF) telok Addis Ababa tsütsü maneni arua linük yimtiba nungi northeast tsütsü kilometre 220 dang pilar aliba Shewa Robit jila agiogo, ta ashir.

Iba sülen rara indang jembitsü asoshi ruling Prosperity Party indang executive committee senden ka mena liasü.

Security forces temi mera danga ka nung sodaksü, ta Defence Minister Abraham Belay-i senden amenba sülen ashi.

"Temelenshi alitsü. Asen nübur dak kechi atalok aser kechi ataloker, teraksa agütsüba kiralongrar, auyar teloki tashiyim amshiba malitsü."

Africa nung nütsüing yongsük timtiba jenjang tanabuba aliba linük nung tensa mejungi akumtsü, ta United States aser danga state temi tekumdangtsü shiogo.

## DR Congo anüdoklen telungpuri nisung 12 tepset

**Kinshasa, Yimpoksüi/Nov. 23 (Agencies):** Democratic Republic of Congo indang northeastern Ituri province nung pei ki yutsür tesem balala nung prokshia aliba civilian dak telungpur telok temi amakba mapang nisung tajemba agi 12 asü, ta mitkar indang odongtar kati ashi.

Cooperative for the Development of the Congo (CODECO) telok nungi züngsemtemi Deobar aonung Drodro yimtsüing amak aser iba mapang tanur trok, tebur pezü aser tetsür ana tepset, ta Ituri nung mitkar sorkar indang odongtar Jules Ngongo-i ashi.

Saka yangji aliba telok kari asüba ya timba alitsü ta ashir.

2017 küm nungi tenzuka CODECO teloki lendong agüja arudang Ituri province kübok Djugu tesem nung civilian noklang aika tepsetogo aser ano meyrirjang aika pei ki yutsür jena aotsüsa akum, ta United Nations ajanga ashir.

CODECO züngsem ya timba Ledu aluyimer kin nungi lir, shirnoki mapang talangka nungi Hema nunger shiruru metsürtem den rara arur.

"Parnok nükjidong ya Drodro nung prokshia aliba nütsüingtem dak amaktsüba ya liasü," ta Ngongo-i ashi.

Ituri nung putir aser Catholic

Charity Caritas indang coordinator Ngabu Lidja Chrysante-i ashiba agi, pa den külem tenzükler lendong atalokdak aliri ibe lendong nung tepsetba nisung 35 tasüming nguogo, shirnoki yangji aliba tekülem ki ka nunga maka liasü.

US nung amenoka aliba Kivu Security Tracker, shirnoki DRC nung azüdokshi atalokba asadanger, parnoki ashiba agi, Drodro aser temeket yimtsüingtem nung nisung tasüming 107 ngutetogo.

"Asürtem ya timba civilian tem lir," ta iba telok yagi ashi.

Congo nung United Nations peacekeeping mission indang odongtar Mathias Gilman-i ashiba agi, nisung 16,000 shi lendong atalokba tesem nungi kumzüka aliba tesem anasa jenoka lir.

CODECO odongtar Patrick Basa-ibo par teloki civilian metepset ta ashir. Drodro nung Hema militia tem den rara saka iba tesem nungi civilian tem jena orr liasü, ta pai osangbener dang ashi.

Lendu aser Hema kin tsüingta 1999 nungi 2007 tashi raraba nung nisung 50,000 shi takum samaogo aser ibai DRC anüdoklen civil war nung azüdokshi tulutiba alitsü.

## Bulgaria bus lendong nung nisung 45 asü



**Sofia, Yimpoksüi/Nov. 23 (Agencies):** Bulgaria anüolen highway ka nung aonung bus ka tsükoka nisung tajemba agi 45 asü, ta lendong atalokba tesem nung ketdangsürtemi ashi.

Mongulbarnü lendong ya kechi tai ajanga atalokar ano mejangja, saka linük yimtiba, Sofia nungi kilometre 45 shi pilar highway nung anepdang 2:00 ako (par mapang) meta bus ya tsükoka mi adoka liasü.

Bulgaria indang interior ministry ajanga asür ya nisung 45 lir ta ashi, anungji iba Balkan linük nung iba ama lendong atalokba rongnung tamajungtiba alitsü.

Iba gari nung tanur 12 liasü, ta ketdangsürtemi ashir. Iba lendong nungi nisung tenet

temang nung mi agi arongba zübu keter takum kumzük aser parnok Sofia nung mozü kidang anepaluba mapang lir.

Bus ya Turkey nungi North Macedonia-i aorba liasü, aser Bosnek yimtsüing anasa mi adokba sülen mesüra mi madokdang highway barrier nung atsükba amai lir, ta ketdangsürtemi ashi.

Interior Minister Boyko Rashkov, shibai lendong atalokba tesem semdang, pai ashiba agi iba lendong nung asürtem ya bus telung nung mitsü kuma rongdok.

"Noksa tetsübutsüka liasü. Ni iba ama noksa kodanga mongudang," ta pai osangbener dang ashi.

Television nunga highway tiyong nung iba bus mi agi

rondoker aliba nguogo, kong tzünglu agi ali ajak metenjemmer liasü.

"Yangi lendong tesashi ka ajurua lir," ta Bulgarian interim Prime Minister Stefan Yanev-i osangbener dang ashi.

North Macedonian Prime Minister Zoran Zaev-i ashiba agi, pai iba lendong nungi takum jenbur ka den jembioogo aser passenger tem mejanga orr aliba ola tulu adoka apokba agi sak, ta ashi.

"Ni kanga aoksaogo. Iba lendong ya kanga tulu lir," ta pai television channel ka dang ashi.

Bus ya North Macedonia nung züluoka lir, anungji asürtem ajak ya par linük nungi alitsü akok, ta Zaev-i ashi. Bus nung alirtem ya Istanbul nung hopta tatem sodi mungger Skopje-i meyipa shilangerba liasü. Iba yimti ana tetsüingta ya kilometre 800 shi lir.

Hombarnü menur North Macedonia travel agency indang bus pezü Turkey nungi Bulgaria-i ait, ta Bulgarian investigative service chief Borislav Sarafov-i ashi.

"Gari aniri aibelenba mesüra technical tsütsü meshidakba nungi iba lendong ya ajurua alitsü südi ta bilemer," ta pai ashi.

## Pakistan-i Afghan nem sen million \$28 jenjang teyari agütsütsü

**Islamabad, Yimpoksüi/Nov. 23 (Agencies):** Afghanistan atema sen million \$28 jenjang medical, chiyongtsü aser danga nungdakbatem teyari agütsütsü, ta Pakistan Ato Kilonser Imran Khan-i sangdong aser India nungi Pakistan ajanga Afghanistan-i chiyongtsü teyari belener aotsü temelaba agütsü, ta pa indang office ajanga ashi.

Hombarnü Khan-i Pakistan yimtiba, Islamabad nung linük army tekolakba General Qamar Javed Bajwa aser foreign minister, finance minister aser national security adviser densema sorkar nung tekolakpur den senden mena liasü.

"Ato Kilonseri tekeratiba nung Pakistan nunger sen billion 5 (\$28.4 million shi) jenjang teyari agütsütsü totuyuba agütsüogo, aser yangji wheat metric tonne 50,000 densema chiyongtsütem, emergency medical supply, asükwa nung amshiba oset amala alitsü," ta iba senden sülen sangdong ka prokshiba nung shia liasü.

Afghanistan nungi osettsüset kar Pakistan nung bener arua ayokba nunga Pakistan sorkari saru balala ajemtsü, ta sangdong ajanga ashi.

India-i Afghanistan nem teyari ama wheat metric tonne

50,000 agütsüba ya India tsütsü teinyaksü tim inyakba sülen tekeratiba nung Pakistan ajanga yoktsü, ta Khan indang office ajanga ashi.

Iba teyari agütsütsü ya ita tetenzüklen sangdong aser November 11 nü Indian foreign ministry ajanga, Afghanistan atongtsü atema tetsükdaksü ajurur, ta shia liasü.

"Onoki takoktsü lenmangtem bushia arur, saka tetsükdaksü ajurur," ta Indian foreign ministry indang odongtar Arindam Bagchi-i shia liasü.

Afghan nungertem India nung temang anepalua lia Taliban-i August ita par linük amokbangba ajanga maruteti alitem Afghanistan-i meyipa arur tema yaritsü, ta Pakistan-i ashi.

Afghan health ketdangsür kar Islamabad semdanga Pakistan health ketdangsürtem den Pakistan nungeri teyari agütsüba indang jembishitsütsü lir, ta sangdong ajanga ashi.

Hombarnüsa US congress nungi US House Foreign Affairs Committee Chairman Gregory Meeks aser Foreign Affairs Asia sub-committee Chairman Ami Bera nati Islamabad nung Pakistan ato kilonser, foreign minister aser danga ketdangsürtem den jembishinüa liasü.

## Hornbill Music Festival 2021 atema TaFMA aser RAL longjemer



**Dimapur, Yimpoksüi/ November 23, 2021 (TYO):** Hornbill Music Festival 2021 atema, Mongolbarnü Task Force for Music & Arts (TaFMA), Govt of Nagaland aser Raymond Apparel Ltd (RAL) na tenanzüktep agiogo.

Taküm iba Music festival sentong atema Parx-i sponsor asütsü. President & Board Member of Raymond Ltd, S L

Pokharna-i ashiba agi, tarutsü nunga brand-i iba sentong den maneni longjemer inyaktüsü tebilemba lir.

Nagaland nung fashion aser music sapur lanurtem atsüa arutsü asoshi Hornbill Music festival ya sabang tuluka lir. Lanurtem atema Parx ya brand ka aser brand atsüa arutsü atema music ya tongtibang sabang ka lir, koba Parx Hunt

(brand indang music IP) indang mapatong takok anguba ajanga tenzük, ta pai ashi.

Kasa sentong nung, Advisor, TaFMA, Theja Meru-ia jembia liasü aser Hornbill Music Festival 2021 sentong nungitta yaritsü mulungba atema Meru-i Parx dang pelaba metetdaksü.

Theja-i, Hornbill festival ya sobaliba benjungmung tuluka lir aser küm shia iba sentong takok ngua aser tuluba achaayanga agia arudar, ta ashi.

Hornbill Music Festival reprangi arurtem tali dang atsüa arutsüa maongka tasen yanglutsü asoshi Parx ama brand kati longjemer inyaktüsü lemetba atema Theja-isa pelaba lemsatep.

Raymond headquarters, Mumbai nung Theja Meru aser S L Pokharna na ajurutepba mapang, tenati tarutsü nunga Raymond Apparel aser TaFMA na longjemer sentong balala nung inyaktüsü asoshi sensaksemogo, ta kasa sangdong nung shia lir.

## Chokriba yimtsüng nung seminar ka ayongzük

**Phek, Yimpoksüi/November 23, 2021 (TYO):** Covid-lockdown sülen, aluyimer dang alu nung mozü mamshi tsünüsembongtsü balala yoka timba züsentetsü aser iba den külemi Phek district nung COVID-19 vaccination maparen kara aotsü ajungmesotsü atema Honibarnü (20.11.2021) Chokriba yimtsüng nung Agri & Horti nung anogo ka seminar den külemi COVID-19 vaccination awareness-cum-vaccination camp ka agia liasü, ta sangdong ajanga metetdaksü.

Phek District Administration akhüm nung Chetheba Circle, Chozuba Sub-Division kübok Chokriba yimtsüng nung Agri & Horti nung seminar den külemi COVID-19 vaccination awareness-cum-vaccination camp ayongzük.

Iba seminar sentong nung,

Chozuba constituency indang MLA, Dr. Chotisuh Sazo-i, vaccination aser Covid sülen rongsenketzüng jenjang yanglushitsü indang nung jembia liasü. Deputy Commissioner, Phek, Razouvolie Dozo-i, district nung vaccination maparen aser nübur nem vaccine ayimjema agütsütsü asoshi tetsükdaksü adokba indang tongmelang agi metetdaksü; aser seminar nung adenertem dang vaccine agiba ajanga külem sensopurtem kümzüka ayutsü asoshi ajungshia liasü.

DAO, Phek-i, 'native crop germplasm' kümzüka ayutsü aser 'organic farming/produce accreditation' indang metetdaksü. Kasa sentong nung, DHO, Phek-i, "post-harvest management and supply chain/market unlinking

with special focus on kiwi" onük nung ajemdaker jembia liasü. Chokriba yimtsüng temeküt nung aluyimer temi kiwi, persimmon aser mozü mamshi süngolemba tem bulua tsüner.

Kasa sentong nung Senior Specialist, District Hospital Phek, Dr. Wemeri aser taoba Executive Director, Chakhesang Women Welfare Society, Vechulo napronglai vaccination indang nung jembigo aser nüburtem dang vaccine agitsü ajungshitsü asoshi Arogo nung lenirtemi shilem agitsüla tenati ashi.

Iba seminar sentong nung EAC Chetheba, Er. Omegali menden liasü aser iba seminar nung yimertem, Arogo lenirtem, tantsü-tambu aser temeküt yimtsüng 8 nungi aluyimertem aruagi denogo, ta kasa sangdong nung shia lir.

## Phek nung KKC Shopping Mall lapokogo



**Kohima, Yimpoksüi/ November 23, 2021 (TYO):** Hombarnü (22.11.2021) Phek Town kübok Phek Town Baptist Church, Pastor, Rev. Dr. Thupuchiya Khesoh-i KKC Shopping Mall meshiteta sarasademtsür sülen iba Shopping Mall lapokja liasü, ta

sangdong ajanga metetdaksü. Iba Shopping Mall ya Clock Tower, Phek town anasa lir. MLA Kuzholuzo (Azo) Nienu-i, kübo (father) asür K.K. Chire nungtem nung iba Shopping Mall yanglutsü, ta ashi. Iba Shopping Mall nung shishilembatsü atema tesem/

takdang 24 yangluja lir. Iba Shopping Mall lapokba sentong nung Phek deputy commissioner Razouvolie Dozo aser tanga ketdangsür balala den lokti lenirtem aser temulunger balala aruagi denogo, ta kasa sangdong nung shia lir.

## MULUNG NEN O

ASO :  
16.08.1956



ASÜ :  
19.11.2021

Onoki teti dang meima aliba asür temeim kinungtsü/ojala **Sentirangla** (Longmisa), Artang Ward Mokokchung, la shiranga aliba anogo nungi asüba anogo tashi nung kija, kibong, lokti balala ana aser talang nung alirtem shirisa rongsen, shisatsü aser tamang sarasadem agi yariogo, talisa meshisemi melitetba ka Dr. Alem aser Dr. Kilang (IMDH), tenati mapang ajak nang (treatment) tajungtiba agi bendanga yariba atema nenok ajak dang ozü kibongi kanga dang pelaba lemsateper. Asen Tulusang Tsüngremi nenok ajak tali dang moajangma.

*Temeim kinungbo, chirnurtem aser kinungertem.*

## Pelaba Lemsateper

Lt. Imlikala (Moayimti)

Onoki teti meima alila, **Imlikala** (Moayimti) ajungbena iba akümli toktsür oor onok mangyimba mapang kija-kibong, Arogo aser lokti shirnokisa nübo, rongsen aser sarasadem agi onok nungita yariogo, nenok dang kinungertemi pelaba lemsateper.

Tsüngremi nenok mapa tajung atema maneni moajangma.

~ **Tsürabur, Adianutem**  
aser **Kinungertem.**



ASO: 07/09/1973  
ASÜ: 24/10/2021

## OFFICE OF THE RIONGSANGER PUTU MENDEN YIMJENKIMONG

(Yimjenkimong Village Council)

H.Q. Alongkima, Dist - Mokokchung : Nagaland

## MOLUNG NEN O

November 23, 2021

Ino L. Chuba Pongen, NSCN/GPRN Yimden kübok temaba jenjang, Co-Convenor, Steering Committee tongtetba atema Riongsanger Putu Menden Yimjenkimong ajanga tepela aser takokba osang lemsateper. Taoba küm metsür pezü tashi kodanga mesetshi-I pai bendanga kasa yimden tenzüka arubayong NSCN/GPRN nung külem lenirtemi Ino L. Chuba Pongen dak tamang kaa agizüker ta onoki amanger. Tarutsü anogotem nung mapa tasen tenzüka inyaka aodang ozü Yimjenkimong Putu Menden-i nü wadang nung amalitepa yariteptsü.

NSCN/GPRN Lenirtemi Ino L. Chuba Pongen nem iba ama mapa teinyaktüsü wadang lemsateper asoshi taroktiba agi pelaba lemsateper aser yamaji temulung lema, imlaba ama pai letetsü ozü timla aser sarasadem.

Sd/-  
**ALEMMEREN TZUDIR**  
Chairman

Sd/-  
**MEYIONEN OZUKUM**  
Secretary



## Office of the Akhoya Shisaluyimer Telongjem

### TENÜNGSANG AGÜTSÜR

Wt. Aketoli S. Sumi, W/o Wb. Imsutoshi Paul, lai "Values and Ethics in the Oral Traditions of the Sumi Naga", onük nung thesis zülua English nung Doctor of Philosophy (Ph.D), Nagaland University; takok tulu ngua konang tetushi bener arutsüba asoshi asen AST ajanga tenüngsang tulu agütsür aser kanga pelaba lemsateper.

Maneni asen Tulusang Tsüngremi ne taküm aser sempet jenjang tuluba nung ajungketa amshiangma ta asen Shisaluyimer sarasadem.

Sd/-  
**Sp. Satemmongba**  
President, AST

Sd/-  
**Kr. Chubakokla Lkr**  
General Secretary, AST

## ICC women's ODI rankings nung Mithali Raj jenjang tasembuba nung lir



**Dubai, Yimpoksüi/ November 23, 2021 (Agencies):** Mongolbarnü, ICC women's ODI rankings sangdonga liasü, kong batter rongnung India captain Mithali Raj taoba ama jenjang tasembuba nung lir. Kasa

rankings nung bowler rongnung külem team nungi Jhulan Goswami-a tanabuba jenjang nung lir.

Raj, shibai rating point 738 ngua lir, la South Africa tsür Lizelle Lee (761) aser Australia tsür Alyssa Healy (750) tesülen

lir. Taoba rankings den medemdangra top 10 batter rongnung temelenshi mali.

Ano, külem India team nungi batter Smriti Mandhana-a point 710 den taoba ama ICC women's ODI rankings nung jenjang trokbuba nung lir.

Bowler rongnung, Goswami (727) ya Australia tsür Jess Jonassen (760) tesülen lir.

Deobarnü, Zimbabwe nung Bangladesh aser Pakistan na ICC Women's World Cup Qualifier asayaba mapang, Pakistan left-arm spinner Nashra Sandhu-i wicket 2/24 agiba sülen, lai jenjang pezü tashi ajangeta iba rankings nung jenjang 17buba tongtetogo.

Bangladesh batter rongnung Fargana Hoque aser Rumana Ahmed napronglai shilem tajung agiba ajanga tenaprongla jenjang temabai tuogo.

## PV Sindhu-i BWF Athletes' Commission election nung tokteptsü

**Yimpoksüi/Nov. 23, 2021 (Agencies):** December 17, 2021 nü Spain nung World Championships ayonga asayaba mapang, Olympic nung medal anaben takok angur P V Sindhu-i BWF Athletes' Commission election nung tokteptsü terenemba lir.

World champion Sindhu, shiba Bali kübok Indonesia Open Super 1000 nung tasayadak lir, menden trok atema tokteptsü pur candidate tuku rongnung la ka asütsü.

"Hokolbarnü (17.12.2021) Huelva, Spain nung Athletes' Commission (2021- 2025) atema election ya TotalEnergies BWF World Champion ships 2021

asayamung den külemi asayatsü," ta BWF sangdong ka ajanga metetdaksü.

"Re-election atema tokteptsü pur Athletes' Commission züngsem rongnung Sindhu kisüng asütsü. 2017 küm Sindhu mezüng shima liasü," ta kasa sangdong nung shia lir.

Sindhu den külemi Indonesia tsür tarep asayar Greysia Polii- i iba election nung shilem agitsü. Tokyo Olympics nung lai gold medal angu.

"Külem asayartem pei pei mangdang ajangzüksü asoshi ni yariner aser international circuit nung tokteptsü asoshi parnok tebilemba angadanga yariner," ta Polii-i ashi.

Iba election atema nominate ser alir tanga asayartem rongnung Scotland nung Adam Hall, Hadia Hosny (Egypt), Iris Wang (USA), Kim Soyeong (Korea), Robin Tabeling (Netherland), Soraya Aghaeihajiagha (Iran) aser Zheng Si Wei (China) nung dena lir.

Athletes' Commission tasen ajanga Athletes' Commission indang tekolak shimer aser BWF constitution kübok nungdakba inyakyimtem asadanger sülen, la/ pa ji BWF Council Member ka akümer.

Taküm May ita, IOC indang 'Believe in Sports' campaign atema Sindhu ya athlete ambassador inyaksü shima liasü.

## New Zealand vs India: KL Rahul melen Suryakumar asayatsü

**Yimpoksüi/November 23, 2021 (Agencies):** India cricket team indang opener KL Rahul tetsüng abilen timtem aliba ajanga New Zealand den aruya aliba Test series match ana nung pa masayatsü. Iba Test series nung Rahul melen Suryakumar Yadav asayatsü.

"Taruba ita South Africa den asayatsü aliba series atema NCA nung Rahul temang anepalua aser training agitsü. All-India Senior Selection Committee-i KL Rahul melen Suryakumar Yadav asayatsü ta sangdongogo. India aser New Zealand tsüngda mezüng Test ya Kanpur nung

November 25, 2021 nungi tenzüksü," ta BCCI sangdong ajanga metetdaksü.

Ano, iba Test series (India aser New Zealand) atema Rohit Sharma anisüngzüker astünung, Ajinkya Rahane-i anir (captain) asayatsü aliba India team nung Shubman Gill aser Mayank Agarwal na opener ama asayatsüsa akümer. T20I series nung India team-i 3-0 agi New Zealand akokba sülen, India-i ano New Zealand den Test match ana asayatsü terenemba lir.

New Zealand aser India tsüngda iba Test series ya World Test Championship (WTC) 2021-

23 indang shilem ka ama asütsü. Taküm June ita WTC Final (2019-2021) nung team anaprongla asaya liasü, kong Kiwis puri wicket 8 agi India madak takok ngua, WTC title angu.

India indang Test squad nungi Ajinkya Rahane (Captain), Mayank Agarwal, Cheteshwar Pujara (vice-captain), Shubman Gill, Shreyas Iyer, Suryakumar Yadav, Wriddhiman Saha (wicket-keeper), KS Bharat (wicket-keeper), Ravindra Jadeja, R. Ashwin, Axar Patel, Jayant Yadav, Ishant Sharma, Umesh Yadav, Md. Siraj aser Prasad Krishna nung asayatsü.



Mokokchung, Yimpoksüi/November 23, 2021: 18 buba Nagaland Inter-District Volleyball Tournament atema Kohima-i apusoa aotsü lia Imkongmeren Sports Complex, Mokokchung nung Mokokchung District Volleyball Association (MDVA) ketdangsürtem den Mokokchung tenüng nungi iba asayamung nung shilem agitsüpur tetsür aser tebur team den tangokba noksa ka yangi angur. Nagaland Inter-District Volleyball Tournament ya Kohima nung November 24 nungi 27, 2021 tashi asayatsü. Temsuchuba, SDO (Civil), Mokokchung aser Monglier, Asso. Pastor, MTBA na lia team anaprongla apusoa liasü.

## Winter Super six Cricket asayamung Kohima nung asayatsü

**Dimapur, Yimpoksüi/ November 23 (TYO):** Midnight Blue Club Kohima-i ayongzükbba mezüngbuba Winter Super six Cricket Tournament, November 28 nungi 30 nü tashi High School Ground, Kohima nung asayatsü.

Iba asayamung nung shilem agitsü atema taa sen 1500 agitsü aser form benoktsü atema tatembangbuba anogoji November 26 nü asütsü. Iba asayamung takoker nem senpet sen 20,000 den takok marok

(Running Trophy), Runners up nem senpet sen 10,000 aser the Player of the Tournament nem senpet den trophy agütsütsü.

Asayamung nung shilem agitsü atema form tem Bigbite, Jail Colony Kohima, Sports World, Main Town, K. Yhome Digital Studio nung angutsü aser osang tejangjaba agitsü atema item number; 7640070079/8415962699 nung tongteprateptetsü, ta ketdangsürtemi sangdong ka ajanga metetdaksü.

## WBBL Team of the Tournament nung Kaur züngoksem

**Yimpoksüi/November 23, 2021 (Agencies):** India T20 tetsür team captain Harmanpreet Kaur, Women's Big Bash League indang official 'Team of the Tournament' nung züngoksemogo. Iba season Melbourne Renegades nungi lenla ajak nung kanga junga asayaba sülen la iba team nung züngoksemogo.

Kaur-i Renegades atema batting aser bowling naprongla nung kanga junga asaya arudar. Lai run ajak senteper 399 yanglua lir, kong half century asem densema lir. La indang strike rate 135.25 aser average 66.5 lir. Taoba hopta Sydney Thunder den asayaba mapang lai out mesüi run 81 yanglu, koba taküm iba asayamung lai run timtiba yangluba asütsü. Maneni lai tang tashi nung six 18 züka lir.

"Harmanpreet Kaur ya Renegades atema bat aser ball naprongla nung kanga asayar tongtibang ka lir aser la club tasenba nung adenba sülen la teyari nung club tejakleni odar," ta cricket.co.au-i ashi.

Team nung leg-spinner,

Georgia Wareham yiruba sülen Kaur-i bowling nunga tongtibang shilem agidar. Arishi küm 32 tain asayar yagi power play nung ball kanga junga ona tang tashi nung wicket 15 agir lir. Lai asaya ka nung run 22 agütsü wicket 3 tashi agir lir.

Smriti Mandhana-i asayamung tepeyong kanga junga asayaka WBBL XI nung India nung rongnungi Kaur kija züngoksema lir. India nung rongnungi Mandhana kija iba asayamung nung century yanglua lir. Lai out mesüi run 114 yanglua liasü.

Asayar tajungtiba XI tem rongnung kaur aser New Zealand all-rounder Sophie Devine na dang bendanger asayar lir. Devine ya Perth Scorchers nungi asayar. Asayar shimertem rongnung cricket.com.au journalist Laura Jolly, taoba Australia asayar Lisa Sthalekar aser Mel Jones aser Australia national selector Shawn Flegler nung densema lir.

Renegades pur Brehostibarnü Challenger nung asayatsü renema lir.

## Indonesia Open: Lakshya aser Kashyap na tsükogo

**Bali, Yimpoksüi/November 23, 2021 (Agencies):** Mongolbarnü, Indonesia Open Super 1000 badminton asayamung tebur kija mezüng round asaya nung, India nung Lakshya Sen-i Japan nung top seed Kento Momota makok.

Almora nungi arishi küm 21 tain Lakshya, shibai taoba hopta Round of 16 (Indonesia Masters) nung Momota-i tsükdaksü, Indonesia Open mezüng round nunga pai 21-23 15-21 Momota makok.

Anaben world champion Momota-i minute 53 nung iba asaya takok angu.

Kasa asayamung tebur kija

mezüng round asaya tanga ka nung, külem India nung Parupalli Kashyap-i 11-21 14-21 agi Singapore nung Loh Kean Yew makokba sülen, pa iba asayamung nungi tsükogo.

Tebur tarep mezüng round nunga India nung tarep M R Arjun aser Dhruv Kapila nati 20-22 13-21 agi Korea nung Choi Solgyu aser Kim Wonho makok.

Temeyoktep tarep mezüng round asaya nung Germany nung Jones Ralfy Jansen aser Linda Efler nati 12-21 4-21 agi India nung Venkat Gaurav Prasad aser Juhi Dewangan tsükdaksü.

## BILEM DANGANG

"Apetetben inyakba mapaji talangka noktaka malir."